

**■ PUNTG DA VISTA**

# Tagliar pustretsch u rankings politics

DA CLAUDIA CADRUVI / ANR

Uss vegn taglià pustretsch en Svizra. Betg sco pli baud la fin d'ina stad si d'alp cun quintar ora quant chaschiel e paintg che mintga pur surveg. Anzi, taglià pustretsch vegn en la politica.

Empè da chaschiel vegnan repartids puncts: Il politicher che ha fatg «pult» survegn massa puncts e paradescha sin il podest cun ina medaglia d'aur.



Rankings u ratings numnan ins questas evaluaziuns.

Ellas duain gidar il votant d'emplenir or endretg il cedel d'elecziun.

Ranking u rating? Expressiuns englaisas vegnan gea gugent duvradas per sa far da grond. Magari era per zuppentar manglusadads sche betg perfin mendas. Tge è il pli impurtant tar in ranking? El sto far la parita dad esser neutral ed objectiv. Mo uschia daventa el credibel e fa impressiun.

Da tagliar pustretsch sa basavan ins pli baud sin il quantum latg che las vatgas d'in pur avevan dà la stad. Tar in politicher sa basan ins sin sia tenuta ed examinescha co ch'el ha votà en il parlament. Ins eruescha sch'el ha sustegnì il militar, las mammas, ils babs, ils impedids etc. Il pli savens sa fatschentan ils rankings politics cun l'economia, per exempel quel da la «NZZ» u quel da



l'associaziun da mastergnants.

Da leger rankings economics è circa uschè interessant sco da leger il fegl parochial. Els repetan sco in mantra – u sco il «rogadieuernus» – che la pps e la pld sustegnan la stgetta concorrenza libra e che la ps ed ils verds fetschian engaldir las interpresas cun regulaziuns e cun tariffas socialas autas per dischocupads u per vegls. E la pcd? Lezza svanescha en rankings economics mingamai en l'inesistenza da la mediocritad.

Auter èsi tar il magazin «Bilanz» che ha publictà l'avust «200 Nationalräte im Test – Wer wirklich für die Wirtschaft kämpft?» Sin il frontispizi ha la revista mess ils chaus dals 15 megliers politichers: otg verd-liberals e set da la pld. Cusseglier naziunal Josias Gasser – sbittà da tschertgels economics grischuns – sa chatta dal reiment sin plaz nov ed ha uschia fatg il meglier plaz dals parlamentararis da noss chantun.

Ils 48 ultims plazs èn occupads cun parlamentararis

da la pps. Ma pertge vegn «Bilanz» tar in resultat quasi cuntrari che tut ils auters rankings economics? L'associaziun da mastergnants ha per exempel dà bunas notas a quels politichers che han votà tenor sias recumandaziuns. La finala vul l'associaziun proteger ils interess da ses agens commembers. Quai numnan ins protecziunsem. Lez na sa cumporta betg cun il princip da la fiera libra che garantescha in'conomia sauna.

Tar la revista «Bilanz» perencunter è era stà decisiv il plazzal da finanzas svizzer. Quel sto puspè sa posiziunar a moda franca en la fiera internaziunala. Parlamentaris che han sustegnì en quest senn il plaz da finanzas han survegnì puncts. Ils parlamentararis ch'èn sa sparunads cunter novas soluziuns ed han insistì stinadamain sin il secret bancar han tratg la curta.

Era cun ina tenuta averta visavi l'Europa han ils politichers pudì avanzar sin buns plazs. «Strusch in auter pajais è uschè dependent dal martgà europeic sco la Svizra», explitgescha «Bilanz» sia repartiziun da puncts.

Tge politicher che sustegna propi l'economia svizra e tgenin betg na sa lascha pia betg dir uschè tgunsch sco quai che tschertins lessan far valair. I na dat nagina objectivitat en quest grà, era sch'ins giavischass criteris che sa laschassan mesirar en liters u kilos sco il quantum da latg tar il tagliar pustretsch.